

王安石全集

國學叢書之一



最新標點

上海

王安石全集卷三十一

律詩 七言絕句

題張司業詩

蘇州司業詩名老，樂府皆言妙入神。看似尋常最奇崛，成如容易卻艱辛。

同陳和叔遊北山

春風蕩屋雨填溝，東閣翛然擁罽裘。鄰壁黃粱炊未熟，喚迴殘夢有鳴驕。

次吳氏女子

（吳氏詩云：西風不入小窗紗，秋氣應憐我憶家。極目江南千

里恨，依然和淚看黃花。南朝九日臺，在孫陵曲街旁，去吾園只數百步。）

孫陵西曲岸烏紗，知汝淒涼正憶家。人世豈能無聚散，亦逢佳節且吟花。

再次前韻

秋燈一點映籠紗，好讀楞嚴莫念家。能個諸緣如夢事，世間唯有妙蓮花。

卽席

曲沼融融泮盡漸，暖煙籠瓦碧參差。人情共恨春猶淺，不問寒梅有幾枝。

遊城南卽事二首

神姦變化久難知，禹鼎由來更不疑。螭魅合謀非一日，太丘眞復社亡遲。

二

秦壇東路遶重營，獨背朝陽信馬行。漫道城南天尺五，荒林時見一柴荆。

寄沈道原

城郭千家一彈丸，蜀岡擁腫作蛇蟠。眼前不道無蒼翠，偷得鍾山隔水看。

哭張唐公

堂（一作：棠）邑山林久寂寥，屬車前日駐雞翹。冥冥獨鳳隨雲霧，（一作：知何處，

）南陌空聞自引簫。

生日次韻南郭子二首

救黔醫剴世無方，斷簡陳編付藥房。祝我壽齡君好語，毗耶一夜滿清香。

二

寒逼清枝故有梅，草堂先對白頭開。殘骸已若雞年夢，猶見騷人幾度來。

八公山

淮山但有八公名，鴻寶燒金竟不成。身與仙人守都廁，可能雞犬得長生。

過徐城

七年五過徐城縣，自笑皇皇此世間。安得身如倉廩氏，一官能到子孫閑。

送丁廓秀才歸汝陰二首

好去翩然丁令威，昔人且在不應非。淮雲豈與遼天闊，想復留情故一歸。

二

西州行路日蕭條，執手傷懷不自聊。遊子故鄉終念返，豈能無意冶城潮？

和惠思韻二首

醴泉觀

邂逅相隨一日閑，或緣香火共靈山。夕陽興罷黃塵陌，直似蓬萊墮世間。

蟬

白下長干何可見？風塵愁殺庾蘭成。去年今日青松路，亦自聞蟬第一聲。

送王石甫學士知湖州

吳興太守美如何，柳惲詩才未足多。遙想郡人迎下擔，白蘋洲渚正滄波。

懷鍾山

投老歸來供奉班，塵埃無復見鍾山。何須更待黃梁熟，始覺人間是夢間。

江寧夾口三首

茅屋滄洲一酒旗，午煙孤起隔林炊。江清日暖蘆花轉，秣（一作：恰）似春風柳絮時。

二

月墮浮雲水捲空，滄洲店坼五更風。北山草木何由見？夢盡青燈展轉中。

三

落帆江口月黃昏，小店無燈欲閉門。側出岸沙楓半死，緊船應有去年痕。

寄碧巖道光法師

去馬來車擾擾塵，自難長寄水雲身。碧巖後主今爲客，何況開山說法人。

省中

萬事悠悠心自知，強顏於世轉參差。移牀獨臥秋風裏，靜看蜘蛛結網絲。

二

大梁春雪滿城泥，一馬常瞻落日歸。身世自知還自笑，悠悠三十九年非。

崇政殿後春晴卽事

悠悠獨夢水西軒，百舌枝頭語更繁。山鳥不應知地禁，亦逢春暖卽啾喧。

省中沈文通廳事

竹上秋風吹網絲，角門常閉吏人稀。蕭蕭一榻卷書坐，直到日斜騎馬歸。

吳仕道說應舉時事

縣瓠城南陂水深，春泥滿眼路嶮嶇。獨騎瘦馬衝殘雨，前伴茫茫不可尋。

送河中通判朱郎中迎母東歸

綠衣東笑上歸船，萊氏歡娛在晚年。嗟我白頭生意盡，看君今日更悽然。

寄題杭州明慶院修廣師明碧軒

明碧軒南竹數叢，別來江外幾秋風。道人無復人間世，嗟我今爲白髮翁。

夜直

金爐香盡漏聲殘，翦翦輕風陣陣寒。春色惱人眠不得，月移花影上欄干。

試院中四首

白髮無聊病更侵，移牀臥竹向秋陰。朝來雁背西風急，吹折江湖萬里心。

二

咫尺淹留可奈何，東西虛共一姮娥。堦前棗樹應搖落，此夜清光得幾多？

三

青燈照我夢城西，坐上傳觴把菊枝。忽忽覺來頭更白，隔牆聞語趁朝時。

四

蕭蕭疎雨吹簷角，噎噎暝蛩啼草根。閑卻荒庭歸未得，一燈明滅照黃昏。

人間

人間投老事紛紛，才薄何能強致君？一馬黃塵南陌路，眼中唯見山北雲。

後殿牡丹未開

紅襖未開如婉婉，紫囊猶結想芳菲。此花似欲留人住，山鳥無端勸我歸。

春日

柴門照水見青苔，春遶花枝漫漫開。路遠遊人行不到，日長啼鳥去還來。

寄韓持國

綠遶宮城漫漫流，明黃小蝶弄春柔。問知公子朝陵去，歸得花時卻自愁。

答韓持國

知公尙憶洛城中，醉裏穿花滿袖風。花亦有知還有恨，今爲紅藥主人翁。

出城

慣作野人多野興，欲爲時用少時材。出城偶與沙塵背，轉覺谿山入眼來。

涿州

涿州沙上望桑乾，鞍馬春風特地寒。萬里如今持漢節，卻尋此路使呼韓。

出塞

涿州沙上飲盤桓，看舞春風小契丹。塞雨巧催燕淚落，蒙濛吹濕漢衣冠。

入塞

荒雲涼雨水悠悠，鞍馬東西鼓吹休。尚有燕人數行淚，回身卻望塞南流。

書汜水關寺壁

汜水鴻溝楚漢間，跳兵走馬百重山。如何咫尺商於地，便有園公綺季閑。

題北山隱居王閑叟壁

荒村日午未開門，雨後餘花滿地存。舉世未能旌隱逸，誰人知道是王孫。

和惠思歲二日二絕

懶讀書來已數年，從人嘲我腹便便。爲嫌歸舍兒童聒，故就僧房借榻眠。

二

沙磧藏春未放來，荒庭終日守陳荄。遙憐草色裙腰綠，湖寺西南一徑開。

赴召道中

海氣冥冥漲楚氛，汀洲回薄水橫分。青松十里鍾山路，祗隔西南一片雲。

江東召歸

昨日君恩悞賜環，歸腸一夜繞鍾山。雖然眷戀朗時祿，羞見琅邪有邛丹。

平甫如通州寄之

北山搖落水嶢嶢，想見揚帆出廣陵。平世自無憂國事，求田應不忤陳登。

寄顯道

舟約刀頭止歲前，故人事使手書傳。出門江口問消息，極目寒沙空渺然。

和平父寄道光法師

欲見道人非一朝，杖藜無路到青霄。千巖高壑排風雨，想對銅鑪柏子燒。

三品石

革沒弁侵弁道周，誤恩三品竟何酬。國亡今日無頑恥，似爲當年不與謀。

和崔公度家風琴八首

屋山終日信飄飄，似與幽人破寂寥。爲有機心須強聒，直教懸解始聲消。

二

簾幕無風起沉寥，誰悲精鐵任飄飄。隨商應角知無意，不待歌成韻已消。

三

萬物能鳴爲不平，世間歌哭兩營營。君知此物心何欲，自信天機自有聲。

四

風鐵相敲固可鳴，朔兵行夜響行營。如何清世容高臥，翻作幽窗枕上聲。

五

南風屋角響蕭蕭，白日簾垂坐寂寥。愛此宮商有真意，與君傾耳盡今朝。

六

風來風去豈嘗要，隨分鏗鏘與寂寥。不似人間古鐘磬，從來文飾到今朝。

七

繫身高處本無心，萬竅鳴時有玉音。欲作鑲耶爲物使，知君能笑不祥金。

八

疏鐵簷間持作琴，清風纔到遽成音。伊人欲問無真意，向道從來不博金。

送陳靖中舍歸武陵

知君欲上武陵溪，水自東流人自西。到日桃花應已謝，想君應不爲花迷。

北山

剝木爲舟數丈餘，臥看風月映芙蕖。清香一陣渾無暑，時有驚根躍出魚。

適意

一燈相伴十餘年，舊事陳言知幾編。到了不如無累後，困來顛倒枕書眠。

尋井

結綺臨春草一丘，尙殘宮井戒千秋。奢淫自是前王恥，不到龍沈亦可羞。

題金沙

海棠開後數金沙，高架層層吐絳葩。咫尺西城無力到，不知誰賞魏家花。

夜聞流

千丈崩奔落石碕，秋聲散入夜雲悲。州橋月下聞流水，不忘鍾山獨宿時。

詠月二首

寒光乍洗山川瑩，清影遙分草樹纖。萬里更無提物動，中天只有兔隨蟾。

二

江海清明上下兼，碧天遙見一毫纖。此時只欲浮雲盡，窟穴何妨有兔蟾。

三

一片清光萬里兼，幾回圓極又纖纖。君看出沒非無意，豈爲辛勤養玉蟾？

王安石全集卷三十二

律詩七言絕句

次韻杏花二首

只愁風雨劫春回，怕見枝頭爛漫開；野鳥不知人意緒，啄教零亂點蒼苔。

二

心憐紅藥與移栽，不惜年年糞壤培；風雨無時誰會得？欲教零亂強催開。

三

看時高艷先驚眼，折處幽香易滿懷；野女強簪看亦醜，少教憔悴逐荆釵。

杏園卽事

蟠桃移種杏園初，紅抹燕脂嫩臉蘇；聞道飄零落人世，清香得似舊時無。

宋城道中

都城花木久知春，北路餘寒尙中人；宿草連雲青未得，東風無賴只驚塵。

對客

窻壁風回午枕涼，清談相對一胡牀，心知帝力同天地，能使人間白日長。

愍儒坑

智力區區不爲身，欲將何力助強秦；只應埋沒千秋後，更足詩書發家人。

遇雪

定知花發是歸期，不奈歸心日日歸；風雪豈知行客恨，向人更作落花飛。

殊勝淵師八十餘，因見訪問之近來如何？答曰：隨緣而已，至

示寂作是詩。

寄託荒山鬼與鄰，一生黃卷不離身！百年薪盡隨緣去，莫學緇郎更誤人。

懷舊

吹破春風水放光。山花澗草百般香，身閑處處堪行樂，何事低徊兩鬢霜。

訪隱者

童子穿雲晚未歸，誰收松下著殘棋；先生醉臥落花裏，春去人間總不知！

海棠花

綠嬌隱約眉輕掃，紅嫩妖嬈臉薄妝；巧筆寫傳功未盡，清才吟咏興何長！

證聖寺杏接梅花未開

紅藥曾遊此地來，青青今見數枝梅；只應尚有嬌春意，不肯凌寒取次開。

雜詠五首

勳業無成照水羞，黃塵入眼見山愁；煙中漠漠江南岸，更與家人一少留。

二

白頭重到太寧宮，玉珮瓊琚在眼中；歌舞可憐人暗換，花開花落幾春風。

三

朝陽映屋擁書眠，夢想鍾山一慨然；投老安能長忍垢，會當歸此濯寒泉。

四

烏石岡頭躑躅紅，東江柳色漲春風；物華人意曾相值，永日留連草莽中。

五

小雨瀟瀟潤水亭，花風颭颭破浮萍；看花聽竹心無事，風竹聲中作醉醒。

書陳祈兄弟屋壁

千里歸來倦宦身，欲尋田宅豫求鄰；能將孝友傳家世，鄉邑如君更幾人！

郊行

柔桑採盡綠陰稀，蘆箔蠶成密繭肥；聊向村家問風俗，如何勤苦尙凶飢。

破家二首

埋沒殘碑草自春，旋風時出地中塵；墦間夜半分珠玉，猶是當時乞祭人。

二

殘棹穿來欲幾春，蕭蕭長草沒麒麟；墦間或有樵蘇客，未必他年醉飽人。

題景德寺試院壁

至和三年八月十日

屋東瓜蔓已扶疎，小石藍花破萼初；從此到寒能幾日？風沙還見一年除。

金陵報恩大師西堂方丈二首